

平定兩金川方畧

三

六

平定兩金川方略

目錄

平定兩金川方略卷之九十八

六月庚子。

上諭軍機大臣曰。明亮現在帶兵赴正地進攻。昨據奏六月初一日已抵吉地。此一帶後路多與金川賊境相通。賊皆得潛出擾截。前此投出番人供詞。又有賊懼官兵由正地進攻之語。賊人狡惡異常。安知非詭計。揚言誘明亮深入。賊乃從旁抄出。以

斷我兵歸路。於事甚有關係。設或稍有疎虞。不特此路行兵阻碍。並恐全局因而牽動。軍心不免生餒。深爲未便。是以朕於此路。時刻繫念。實因此路非阿桂軍營之谷噶一帶。及明亮原營之馬尼一帶可比。況此路不過乘間出奇之用。與阿桂直攻勒烏圍者不同。今阿桂處兵力較盛。現在覓路進攻。又係從上壓下。自可望其得手。朕亦惟於阿桂

一處。佇盼捷音。其明亮一路。本非正兵。原不冀其必能集事。而防範則不可不周。富德等務於明亮進兵後路。不時遣人探聽。俾得消息常通。密爲籌備。

癸卯。舒常奏言。六月初一日。綽斯甲布土兵入林樵採。有賊四五十人。從內突出。適遇放哨官兵。放鎗攻壓。賊番被傷潰散。至本月初四日已

刻外委李連元等。隱見達爾圖山梁西邊。箐林
內有漢兵五六十人。自上而下。料是賊人改裝
搶掠。卽與放鎗接仗。各處伏兵齊起。賊人隨卽
奔散。又有三四十賊。由丫口欲來接應。臣卽用
礮轟擊。遙見賊人中礮落溝甚衆。官兵乘勝追
殺。至礮卡極近。山路極陡處。始行撤回。此次殺
賊八九名。其餘帶傷者甚衆。

同日。阿桂。豐昇。額色布騰巴爾珠爾奏言。臣等

於前所拏礮臺之外。茲又連拏木柵二座。距賊

僅有一箭之地。晝夜轟摧。賊礮上截。已漸次摧

殘。約計二三日。即可奮力搶撲。近日前敵上時

有賊番叫喚。用礮屢經擊斃。而賊番叫喚愈急。

據稱僧格桑已經身死。或將屍身擡來。或差人

前去驗看等語。臣等令土兵高聲斥罵。以僧格

桑罪大惡極。金川敢於容留。卽應將索諾木一
同勦滅。前次稱將僧格桑擒獻。尚且不受。今已
就死。更何值差人往驗。況僧格桑雖死。索諾木
自應代伊受縛。以昭顯戮。賊衆聞之。皆股栗奔
竄而去。竊思僧格桑之死。雖未可信。但前據脫
出番人已有僧格桑患病之語。如果已受冥誅。
則竄入之小金川番人。自必心生離畔。而僧格

桑雖死。大兵仍復四面奮攻。賊知

天朝勢欲將金川埽殄。自必益加震動。均奏入。

上諭軍機大臣曰。舒常奏達爾圖山梁丫口。見有漢

兵五六十人。官兵料是賊人改裝。希圖搶掠。放鎗

迎擊。賊人逃竄等語。賊番竟敢改裝潛出。甚爲可

惡。但賊番雖甚狡惡。從未聞其能如此詭詐。此必

叛逃從賊之張坤忠所教。實堪切齒。其人非但不

可輕宥。并不當僅以誅磔完事。大功告成時。務將
張坤忠拏獲。派員嚴密管押。檻車解京。備具嚴刑。
盡法處治。方足以雪憤恨。至賊旣能施此狡獪伎
倆。恐設計引誘官兵。亦所不免。各將軍叅贊等均
當一體精心防備。又阿桂奏。近日賊人稱僧格桑
已經身死。或將屍首擡來。或打發認識人去驗看
等語。阿桂等斥詈之語。詞義嚴覺嚴正。但於賊人

奸詐底裏。未曾揭破。不能使之畏懼。竟當令士兵
向衆賊云。爾等前用木籠擡獻僧格桑時。將軍等
以兩賊酋方狼狽爲奸。豈肯無端擒獻。必係賊匪
詭詐。斷不可信。因其時既不受爾所獻之囚。亦不
值向爾鼠輩講論。今賊酋見前計未售。復爲此計。
則爾等鬼蜮肺腸。更加顯露。豈能爲爾所惑。爾等
可回告賊酋。以索諾木兄弟負恩犯法。罪大惡極。

爲

載所不容。必須剿滅殲誅。爲衆良善土司除害。今天
兵壓境。賊巢破在旦夕。若衆番明於順逆。卽將索
諾木。莎羅奔兄弟。及助惡之頭人等。縛獻軍門。尚
可貸爾番衆之罪。若僅以僧格桑搪塞。無論其死
活存亡。皆所不問。亦斷所不受。又安肯派人赴賊
巢。驗看其真假乎。土兵等傳語斥詈訖。卽一面用

鎗礮轟擊。并令官兵等共知此意。使不爲浮言所感。至向來自賊中脫出官兵。止供稱被賊掠去。收於地窖。從未言及賊人問其軍營虛實情形若何。此卽綠營惡習。恐以漏洩軍情獲罪。故爾諱匿不當。而將軍等亦從未以此訊供。未免疎漏。想來賊人不時掠我兵丁。自係欲探內地消息。況賊番向與內地交易。能說漢語者自不乏人。豈有不向其

詳訊軍營諸事之理。著傳諭將軍等。所有節次脫
出之綠旗兵丁。若尚留營充伍。卽令將軍聚贊等
就近隔別研訊。其已遣回原營者。卽令文綬提至
省城研訊。問其被賊拘留時。詢以何語。務令確實
供明。勿使絲毫隱飾。

同日。阿桂。豐昇。額色布騰巴爾珠爾。又奏言。駐
扎丹壩總兵五福。同副將李天佑。於六月初三

日。駕馭丹壩土舍頭人派兵一百四十名。卽於
是夜進攻穆爾津岡賊礮。至初四日丑刻。斫開
礮門。拋放火彈。內賊六名。均經殺斃。隨將戰礮
放火焚燒。其山梁礮卡賊人。齊來救援。各兵又
奮勇上前接仗。斃賊甚多。查丹壩兵丁爲數無
多。原不足以資深入。但屢次殺賊燒礮。亦可以
寒其膽。而分其勢。臣等又密諭以初十日前後

各路官兵約齊併力進攻。該鎮等鼓勵士兵。屆期搶殺。自必更能得手。奏入。

上嘉之。

同日。阿桂、豐昇、額色布、騰巴爾珠爾又奏言。查小金川番人。於所獲糧食。俱擇隱僻處所。掘窖埋藏。而所埋不過數斗。零星分貯。非其親自窖藏者。卽不能知。其習俗然也。臣等從前亦令土

兵各處察看。如有窖藏跡跡。卽行挖刨。然並無所獲。惟是小金川地方。其山坡平坦之處。去歲番人零星種有秋麥。現已揚花吐穗。雖爲數無多。亦不可任其出而偷割。查鄂克什。別斯滿等處番人。素皆貧窘。得此尚足以裨生計。現今鄂克什土司策塔爾。及管理別斯滿之侍衛穆塔爾等。帶領老幼婦稚。收割並酌派土兵於收穫